

**ACTA DA COMISIÓN INFORMATIVA DE CULTURA, EDUCACIÓN,
PATRIMONIO HISTÓRICO, DOCUMENTAL E LINGÜÍSTICO**

A Comisión Informativa de Cultura, Educación, Patrimonio Histórico, Documental e Lingüístico reúne no Pazo provincial ás 12:25 h do día 21 de febreiro de 2025, baixo a presidencia de, **D. JORGE CUBELA LÓPEZ** e a asistencia dos seguintes deputados e deputadas: **D. RAFAEL DOMÍNGUEZ ARTIME, D.ª MARÍA SANDRA BASTOS MÍGUEZ**, en substitución de D.ª LUISA MARÍA SÁNCHEZ MÉNDEZ, **D. RICARDO MARTÍNEZ CHANTADA, D.ª MARÍA PILAR RAMALLO VÁZQUEZ, D. MANUEL ALEJANDRO LORENZO ALONSO, D.ª MARÍA NAVA CASTRO DOMÍNGUEZ, D. JESÚS VÁZQUEZ ALMUÍÑA, D. MARCOS GUIASOLA PADÍN, D. GREGORIO LUÍS AGÍS GÓMEZ, D.ª DIGNA ROSA RIVAS GÓMEZ, D. PACO FERREIRA GONZÁLEZ, D.ª NURIA RODRÍGUEZ RODRÍGUEZ, D. GORKA GÓMEZ DÍAZ, D. JAVIER IGLESIAS MOUGÁN, D. XOSÉ CESÁREO MOSQUERA LORENZO e D.ª MARÍA ORTEGA IÑARREA**, coa seguinte orde do día:

1.- LECTURA E APROBACIÓN, SE PROCEDE, DA ACTA DA SESIÓN ANTERIOR

Non existe ningún reparo e apróbase por unanimidade a acta da sesión do día 24 de xaneiro de 2025.

2.- DAR CONTA DAS BASES REGULADORAS E CONVOCATORIA PARA O ANO 2025 DO PROGRAMA "+MÚSICA" DE APOIO Á PROGRAMACIÓN ARTÍSTICA PROFESIONAL EN GALEGO NOS CONCELLOS DA PROVINCIA DE PONTEVEDRA (Expte. 2025003603)

O presidente dá conta das bases reguladoras do programa "+Música", de apoio á programación artística profesional en galego nos concellos da provincia de Pontevedra, aprobadas pola Xunta de Goberno desta Deputación na súa sesión ordinaria do 7 de febreiro de 2025 e publicadas no BOPPO núm. 29, de 12 de febreiro de 2025. Estas bases teñen por obxecto aprobar a convocatoria 2025 do programa "+Música" e regular os criterios de concesión das solicitudes de actuación de grupos do catálogo "+Música" que se desenvolverán na provincia de Pontevedra, con cargo á aplicación 25/330.3340.226.30 por un importe total de 700.000,00 €.

Beneficiaranse deste programa os concellos da provincia de menos de 50.000 habitantes, co seguinte cofinanciamento: a Deputación aboará o 100% do caché do espectáculo dos grupos ou artistas e o concello aboará a produción técnica das actuacións. Os concellos poderán seleccionar unha única actuación, que se supera os 12.000 € terán que engadir unha segunda opción de menor importe, ou ben por dúas actuacións que en total non superen o importe de 12.000 €. O prazo de solicitude será dende o 20 de febreiro ao 5 de marzo de 2025.

3.- DAR CONTA DAS BASES REGULADORAS E CONVOCATORIA PARA O ANO 2025 DO CIRCUÍTO "+ESCÉNICAS" DE APOIO Á PROGRAMACIÓN DE ARTES ESCÉNICAS EN GALEGO NOS CONCELLOS DA PROVINCIA DE PONTEVEDRA (EXPTE. 2025004266)



O presidente dá conta das bases reguladoras do circuío “+Escénicas” de apoio á programación de artes escénicas en galego nos concellos de ata 20.000 habitantes da provincia de Pontevedra, aprobadas pola Xunta de Goberno desta Deputación, na súa sesión ordinaria do 14 de febreiro de 2025 e publicadas no BOPPO núm. 34, do 19 de febreiro de 2025. Estas bases teñen por obxecto actualizar o catálogo “+Escénicas” e regular e aprobar a convocatoria para o ano 2025 do circuío, que se desenvolve con cargo á aplicación 25/330.3340.462.04 por un importe total de 195.000,00 €.

Mantense a porcentaxe de cofinanciamento entre Deputación e Concellos da primeira edición do circuío, asumindo a Deputación un 90% no caso das solicitudes dos concellos de ata 5.000 habitantes, un 80% nos de 5.000 a 10.000 e un 70% nos de 10.000 a 20.000. Como novidades nesta edición, poderán inscribirse no catálogo espectáculos por un importe de ata 7.000,00 €, ive e produción técnica incluídas e a inscrición será compatible co mantemento ou inscrición da compañía, entidade ou artista no catálogo de grupos “Culturea”, sempre que reúnan os requisitos correspondentes. Os concellos percibirán unha subvención máxima de 3.800,00 euros, correspondente á porcentaxe de pago do total de espectáculos solicitados, asumindo eles a diferenza co orzamento total. Poderán solicitar ata un máximo de 5 espectáculos do catálogo de artistas, compañías e entidades distintas e no caso de solicitar 4 ou máis, alo menos un deles será da modalidade +Danza.

Os prazos de inscrición e modificación de espectáculos no catálogo “+Escénicas” será do 1 ao 28 de febreiro de cada ano natural, para a solicitude de espectáculos por parte dos concellos do 17 ao 31 de marzo e para a xustificación, antes do 15 de abril de 2026. A programación do circuío desenvolverase entre o 1 de abril de 2025 e o 31 de marzo de 2026.

4.- DAR CONTA DAS BASES DE SUBVENCIÓNS PARA A CREACIÓN, O MANTEMENTO E O REFORZO DOS SERVIZOS DE NORMALIZACIÓN LINGÜÍSTICA DIRIXIDAS AOS CONCELLOS E A OUTRAS ENTIDADES LOCAIS DA PROVINCIA DE PONTEVEDRA PARA O ANO 2025 (EXPTE. 2024084029)

O presidente dá conta das bases de subvencións para a creación, o mantemento e o reforzo dos Servizos de Normalización Lingüística (SNL) dirixidas aos concellos e a outras entidades locais da provincia de Pontevedra para o ano 2025, aprobadas pola Xunta de Goberno desta Deputación, na súa sesión ordinaria do 31 de xaneiro de 2025 e publicadas no BOPPO núm. 28, de 11 de febreiro de 2025. Estas bases teñen por obxecto aprobar a convocatoria pola que se rexerá a concesión, seguimento e xustificación das axudas económicas, en réxime de concorrencia non competitiva, destinadas a crear, manter e reforzar os SNL dos concellos e doutras entidades locais da provincia no período que abrangue do 1 de xaneiro ao 31 de decembro de 2025. A concesión das subvencións estará suxeita á dispoñibilidade orzamentaria e farase con cargo á aplicación 25/334.3340.462.04 do Orzamento provincial por un importe total de 200.000,00 €.

Poderán solicitar estas axudas para a creación dun SNL os concellos da provincia de Pontevedra de menos de 50.000 habitantes ou as agrupacións de concellos, mancomunidades ou entidades



loais da provincia, mentres que as axudas para o mantemento ou reforzo do mesmo poderán solicitálas eses mesmos concellos e entidades, pero que no momento da publicación desta convocatoria teñan creado e en funcionamento un servizo lingüístico e os que queiran melloralo contratando persoal a maiores ou incrementar a xornada do persoal existente.

Nas axudas para a creación de SNL, a Deputación achegaralle a cada entidade solicitante (concello, mancomunidade, entidade local menor ou agrupación de concellos) o 100 % do orzamento de gastos de persoal do SNL no caso de creación do servizo, ata un máximo de 35.000,00 euros, co compromiso adquirido de manter o devandito servizo nas dúas anualidades seguintes e de dotalo nos seus orzamentos económicos coas cantidades correspondentes polas porcentaxes restantes do seu custo salarial. Nas axudas para o mantemento e reforzo de SNL, a Deputación achegaralle a cada entidade solicitante o 80 % do orzamento de gastos de persoal do SNL no caso de mantemento do servizo, ata un máximo de 25.000,00 euros.

O prazo de presentación de solicitudes será dun mes, contado a partir do día seguinte ao da publicación da convocatoria no BOPPO e na BDNS.

5.- DAR CONTA DAS BASES REGULADORAS DE SUBVENCÍONS EN CONCORRENCIA COMPETITIVA PARA EDICIÓNS DIRIXIDAS A ENTIDADES SEN ÁNIMO DE LUCRO PARA O ANO 2025 (EXPTE: 2024083217)

O presidente dá conta das bases reguladoras de subvencións en concorrencia competitiva para edicións dirixidas a entidades sen ánimo de lucro para o ano 2025, publicadas no BOPPO núm. 33, do 18 de febreiro de 2025, que teñen por obxecto aprobar e regular o procedemento de concesión destas axudas destinadas á edición en formato papel e a edicións audiovisuais, mixtas e noutros formatos especiais que se editen en galego normativo durante o período comprendido entre o 1 de xaneiro e o 31 de decembro de 2025, coa finalidade de colaborar na difusión de traballos de interese para a permanencia, o recoñecemento e a identidade da cultura galega a través do tempo.

Este programa de subvencións financiarase con 100.000,00 euros, con cargo á aplicación 25/332.3322.789.00 do Orzamento provincial. O importe máximo da subvención para cada edición non poderá exceder o 70 % do orzamento total. No caso de publicacións en papel, non superará os 3.500,00 euros e, no de edicións en formato audiovisual, non excederá os seis mil 6.000,00 euros. Para as edicións mixtas, que inclúan publicacións en papel e en formato audiovisual, o importe total subvencionado non será superior aos 8.000,00 euros. No caso dos formatos especiais de edicións para persoas con diversidade auditiva, visual ou cognitiva, non superará os 10.000,00 euros.

Poderán beneficiarse destas axudas as entidades sen fins de lucro con domicilio social na provincia de Pontevedra ou excepcionalmente de fóra desta, sempre que as edicións obxecto da subvención traten temas de interese para a provincia e reúnan os requisitos da convocatoria. As publicacións editaranse exclusivamente en galego normativo, serán de interese municipal,



provincial ou comarcal, en relación coa provincia de Pontevedra e publicaranse durante o 2025 nas modalidades de papel, audiovisual, mixto ou especial (adaptado a persoas con diversidade auditiva, visual ou cognitiva).

O prazo de presentación de solicitudes será dun mes, contado a partir do día seguinte ao da publicación da convocatoria no BOPPO e na BDNS.

6.- ROGOS E PREGUNTAS

Non se produciron

Non habendo máis asuntos que tratar, dáse por concluída a reunión ás 12:30 horas do mencionado día, do que eu como secretaria dou fe.

